



**PRIMEIRO
MINISTRO**

**DISKURSU
SUA EXSELÊNCIA PRIMEIRU-MINISTRU
DR. RUI MARIA DE ARAÚJO
IHA OKASIAUN APREZENTASAUN
PROGRAMA VI GOVERNUN KONSTITUSIONAL
IHA PARLAMENTU NASIONAL**

Parlamentu Nasional, Díli
24 fulan Marsu tinan 2015



Palácio do Governo,
Avenida Presidente Nicolau Lobato,
Dili, Timor-Leste

Sua Excelência
 Senhor Presidente Parlamento Nacional
Excelências Senhores
 Vice-Presidentes Parlamento Nacional
Excelências
 Senhoras no Senhores Deputado sira

Senhora no Senhores membru Governo

Senhoras no senhores sira hotu,
Povo Timor-Leste no telespetadores sira,

Ho onra no satisfasaun boot tebes maka ohin hau diriji dala uluk liu, nu'udar Primeiru Ministru VI Governu Konstitusional, ba Uma Fukun Demokrasi ida ne'e, ho konviksaun tomak katak ita, Governu ho Parlamentu Nasional, sei servisu hamutuk liu husi forma konstrutiva, iha tempu presente no ba futuru ita nia Nasaun nian.

Molok atu hakat do'ok liu ba oin, hau hakarak aproveita mos biban ida ne'e atu agradese solidariedade, husi distintu deputadu sira hotu, ba hau nia saúde, no kompriensaun diak hodi adia apresentasaun Programa VI Governu to'o ohin lora.

Liu tiha fulan ida hafoin ami simu pose, ohin Governu mai iha ne'e, tuir Konstituisaun haruka, atu submete ba debate no apresiasaun Distintu Deputadu sira nian, Programa husi VI Governu Konstitusional.

Hau sei la haluhan atu temi iha ne'e responsabilidade boot ne'ebé, atu ida ne'e representa ba hau no ba Governu tomak. Responsabilidade tanba privilejiu boot tebes atu bele servisu hamutuk ho Povo, no ba Povo Timor-Leste; responsabilidade moos, tanba ami nia lala'ok banati tuir, ho respeito tomak legadu ne'ebé ami simu husi governu anterior.

Wainhira ami assume funsoens, ami assumi moos kompromisu atu honra no preserva ita nia istoria rezistencia, hodi dignifika hahalok erois no combatentes libertasaun nasional nian, no fo'o continuidade ba prosesu konstrusaun no konsolidasaun ita nia Estadu, ita nia instituisaun no valor demokratiku ne'ebe ita banati tuir.

Entrega ona ba ami jersaun foun, oportunidade atu hatutan esforsu unidade nasional, soberania no desenvolvimentu, iha sinerjia ne'ebé renovadu, hodi hatutan ba libertasaun povu nian – husi muktik, husi analfabetismu, husi moras, husi injustisa no dezigualdade, no hosi kondisaun a'at hotu ne'ebe hanaran ki'ak.

Ida ne'e kauza nasional ida ne'ebé ijiji partisipasaun ema hotu nian. Ida ne'e dezafiu ida ne'ebé obriga ita sai reziliente, disiplinadu no dedikadu, hanesan moos iha pasadu, eroi timor oan hotu hotu – hirak ne'ebe mate ona no hirak ne'ebé sei moris – wainhira sira servisu la sura kolen atu manan ita nia independensia nasional.

Laos esforsu ema bakun nian deit maka lori ita ba independénsia nasional, maibé esforsu koletivu husi povu tomak. Nune'e, laos deit esforsu izoladu husi Governu ida ne'e maka sei lori ita hodi ultrapasa ubstakulu moris kiak no mukit nian, maibe esforsu konjugadu husi Governu sira ne'ebé liu tiha ona, governu ida agora dadaun, no governu sira iha futuru, hamutuk ho kolaborasaun ne'ebé metin ho Oragaun Soberania sira, ho Sociedade Sivil, no ho Timor Oan tomak – hotu-hotu unidu iha kausa dezenvolvimentu ida ne'e, no serbisu ho responsabilidade ba populasau tomak nia moris diak. Ita nia “kultura rezistencia luta nian” hatudu ona mai ita katak orientasaun politika no sosial ida ne'e, lori rezultadu diak. Maibé'e iha tempu ohin loraun, ita prezisa adapta ita nia ‘gene’ gerilleiru nian, ba “kultura dezenvolvimentu”. Tanba ne'e, continuidade, responsabilidade no partisipasaun koletiva sai nu'udar liña mestra husi governasaun ida ne'e.

Dinamika foun ida ne'e, ne'ebe konjuga estrutura ida ne'ebé joven, fungsional no efisiente, ne'ebé Eis-Primeiru-Ministru Kay Rala Xanana Gusmão, wainhira halolon ninia testemuñu, hakarak inkuti iha Governu foun no iha sosiedeade nia leet, mai ho objetivu atu hamosu mudansa mentalidade ida, ne'ebé iha mentalidade ida ne'e, sidadaun Timor –oan ida idak nia prioridade máxima, maka hadomi ninia Patria, respeita ninia kompatriota sira, no serbisu ba no hamutuk ho Timor oan hotu-hotu.

No wainhira ita koalia kona ba servidor publiku, buat ida ne'e sai relevante liu tan, tanba servidor publiku sira iha responsabilidade adisional iha area jestaun no implementasaun ne'ebé justu no transparente, husi investimentu públiku Nasaun nian.

Iha VI Governu nia laran halibur hamutuk hela komponente ne'ebé loos liu atu bele hamosu prestasaun serbisu ne'ebé di'ak liu ba popoulasaun: iha VI Governu ida ne'e, iha konverjensia husi talentu ne'ebé iha, konverjensia kualifikasaun, konverjensia esperiensa no deliberaun ne'ebé izentu husi ideolojia, doutrina no interese polítiku-partidáriu.

Ba kapasidade, kompeténsia no empenhu boot ne'ebé iha ona VI Governu nia laran, ami sei tau hamutuk tan, matenek no koñesimentu ne'ebé luan no klean, husi maun boot líder sira jersaun anterior, ne'ebé ami konsidera nu'udar ami nia mentor, no ami sei nafatin konsulta, no rona no hakraik aan, sira nia opiniaun.

Tanba ne'e, hau sei la haluha atu salienta importánsia husi aspetu fundamental ida ne'ebé ita hotu simu husi lideransa anterior: klima paz no estabilidade sosial no politika, ne'ebé oras ne'e dadaun ita moris iha nita nia rai laran.

Se laiha paz no estabilidade, sei laiha investimentu nasional ka invesntimentu estranjeiru, sei la iha turismu, no sei laiha, hau hanoin ida ne'e aspetu fundamental tebes, sei laiha konfiansa husi ita nia povu rasik iha ita nia instituisaun, no ita nia lider sira.

Tanba ne'e, iha situasaun hirak ne'ebé tau em kauza ordem publika no tau em kauza autoridade Estadu nian, sei la iha fatin ba permissividade ka passividade. Manutensaun estabilidade no seguransa interna kontinua nu'udar alvu prioritáriu husi atensaun Governu ida ne'e nian.

Ami aprende nudar alunu diak ida katak ita tenki aprende husi lisaun nebe mak uluk aprende tiaona. Istoría ita nian hanorin ba ita katak importante tebes estuda didiak problema hotu no bele hetan solusaun nebe diak, bele hetan rezultadu iha tempu ne'bé naruk hodi bele promove rekonsiliaun no sesasaun ba seguransa, hodi atinje ideia liberdade nian ne'ebé timor oan sira luta iha dékada rua nia laran.

Ho razaun ne'e, hau atu fo hanoin fali katak, trazisaun governativa – husi V Governu ba VI Governu – hanesan pasu importante demokrasia nian iha pais laran, tanba honoin ho logika determinadu ida hodi servi interese nasional liu interese privadu hodi bele fo solusaun ba dezafiu nebe pais hasoru, ho forma gradual ho vizaun ba continuidade ba susesu longu prazu.

Excelências

Senhoras no Senhores sira,

Programa VI Governu Konstitusional iha deit tinan rua resin uitoan atu bele implementa. Tanba ida ne'e, importante atu subliña katak Programa ida ne'ebé ita sei debate, laos programa foun ida, maibé kontinuasaun husi polítika hirak ne'ebé define iha Planu Estratéjiku Dezenvolvimentu 2011-2030, ne'ebé tau ona, ho hahu implementa ona iha Programa V Governu.

Vizaun dezenvolvimentu ne'ebé ita iha atu implementa, la rezume deit ba tinan rua ho balun, no laos deit ba tinan lima ka tinan sanulu iha lejislatura hirak tuir mai, maibé vizaun longu prazu ida, ho ninia abut iha Planu Estratéjiku Dezenvolvimentu.

Vizaun ba Timor-Leste ninia dezenvolvimentu, la pertense deit ba Governu ida ne'e, ka ida ne'ebá, maibé pertense ba povu tomak. Tanba ida ne'e, ita presiza implementa ho sekuensialidade (ka tutuir malu ho diak), medida no asaun hotu iha tinan hirak tuir mai, hodi bele atinje meta ne'ebé trasa tiaona ba 2030.

Husi perpetiva ida ne'e, kestaun ne'ebé koloka wainhira halo análise ba Programa VI Governu, la'os liu liu saida maka atu implementa maibé oin sa atu implementa. La'os atu decide prioridade saída, maibé oinsa atu implementa ho efikasias, efisiensias no responsabilidade, buat ne'ebé sai ona prioridade ba nasaun tomak.

Membru husi ezekutivu ida ne'e halo tiaona análise sektoral ba buat ne'ebé V Governu kompromete aan atu halao. Sira identifika pontu situasaun atual, hodi tetu didiak buat ne'ebé implementa tiha ona, no saida maka atu implementa too 2017, no buat ne'ebé, maski la posivel atu konkretiza kompletamente iha período ida ne'e, bele netik lansa baze konsesaun no implementasaun, hodi bele hetan continuidade iha futuru.

Nu'udar Primeiru Ministru halao ona vizita ba organizasaun, departamentu no instituisaun Estadu, inklui eskola, ospital no sentru saude, hodi hatene diak liu tan situasaun real pais nian. Nune bele iha diagnostiku nebe konkretu hodi Governu bele halo atuasaun tuir nia dalan, no aplikasaun sistema nebe boot ba dezafiu nebe pais hasoru.

Konteudu programa laos sai hanesan kestaun prinsipal, maibe hanesan kontinuasaun ba programa uluk nian, maibe nia forma implementasaun sei hare liu ba rezultadu.

Senhor Presidente Parlamentu Nacional
Vice-Presidentes Parlamento Nacional
Senhoras no Senhores Deputadus sira

Hadiak prestasaun servisu sai nu'udar foku prinsipal ba Governu ida ne'e. Iha kontestu ida ne'e ami sei fo prioridade liu ba :

- (1) **Hadiak qualidade obras publikas** - tanba programa ingtegradu ba infrastrutura sei fo vantajen diak bainhira obra sira ne'e halo ho qualidade no proporsional ba valor investimentu. Ne'e signifika katak ejije rigor, profesionalismu, planeamentu, fiskalizaun no kontrolu ba kustu sira - material, rekursu umanu no empreza kontratada sira.
- (2) **Reforma administrasaun publika** - tanba servisu publiku sira molok atu halao sira nia funsaun sira jura atu kumpre konstituisaun no Lei sira no servisu ho izensaun, onestidade no profesionalismu, hodi defende no asegura interese Nasaun nian. Nune sei ejije responsabilidade ba sira nia hahalok, halo avaliasaun dezenpeñu no promosaun baseia ba meritu. No mos sei halo analize nebe klean ba nesesidade administrasaun publika hodi hadia prosesu kontratasaun, responsabilizasaun ba servisu nebe sira halao, rigor iha jestaun ba bens publikus hodi nune evita despeza desnesesariu. Sei mos kombate ba sistema burokratizasaun.
- (3) **Harmonizasaun no uniformizasaun ba lei** - Iha nesesidade atu desenvolve lalais lei juridiku tuir kultura timor nian, estandarizadu no harmonizadu, hodi timor oan sira bele identifika an, kria mos medida hodi transforma sistema juridiku ba iha sistema bilingue (*ka ho lian rua*).
- (4) **Reforma fiscal** - tenki hadiak ekilibriu fiskal liu husi sistema tributariu hodi bele rekolla tan reseita domestika sira, mantem fiskal kompetitivu hodi bele dada investimentu.

Atu konkretiza objetivu sira ne'e, estrutura organika Governu nian rasik optomiza tia ona hodi bele iha kordenasaun diak liu, iha atividade governamental. Nune'e hau hakarak saliente katak:

- (1) Programa Governu ida ne'e laiha agenda ba politika foun ida, maibe mai ho hanoin ida katak atu **halo continuidade**, no mos fo oportunidade hodi halo fali avaliasaun no ajustamentu ba projetu ne'ebé halao dadaun hela. Rezultadu ida ne'e, hanesan programa ne'ebé adekuaudu ba tempu ne'ebé sei iha ba mandatu ne'e nian, maibe, importante liu sai hanesan mata dalan politika sustentavel ba longu prazu.
- (2) Programa ida ne'e programa ida ne'ebé **sektorialmente transversal**, no fundamental tebes atu iha kordenasaun diak husi ministeriu hotu hotu iha administrasaun publika nia laran. Ba objetivu ida ne'e, hau fo ezemplu ida

hanesan “Protesaun ba Labarik no Joven sira”: ne’e ejije intervensan ativa husi Ministru Estadu Kordenador Asuntu Sosial, nebe sei kria Komisaun Direitu ba Labariki; Ministeriu Solidariedade Sosial hodi foti medida ba protesasun Sosial, kosok-oan sira no juventude; no mos Ministeriu Justisa hodi halo adaptasaun ba kadru legal; Ministeriu interior hodi halo prevensaun no violensia ba labarik sira; Sekretaria Estadu ba Politika Formasaun Profisional no Empregu hodi tau matan no kombate traballu infantil (*labarik halo serbisu ho idade ki’ik*). No mos ho Ministeriu relevante sira seluk, ho programa ne’ebé alargadu, promove saude, edukasaun, formasaun profisional, kultura, no espesial liu ba ita nian joven sira, hodi halo kriaun ba empregu. Atu halo implementasaun ba programa forma transversal ida la hanesan projetu ka ministeriu ida nian deit hodi bele alkansa objetivu nebe hakarak, maibe hotu hotu sei hamutuk halao serbisu hanesan ema ida deit.

- (3) Programa ida ne’ebé hakarak atinje **boa governasaun**, iha aspetu atuaun ezekeutivu tomak nian, inklui planeamentu nebe hodi hetan rezultadu diak, koresaun ba sistema no mekanismu servisu, transparénsia, responsabilidade no responsabilizasaun iha implementasaun programa hotu, hodi nune mos bele proteje ita nia fundu minarai. Ita sei sai inimigu ba ita nia dezvoltamentu rasik bainhira ita la tau importansia ba korupsiun ho seriedade! Ne presiza korajen ema ida idak nian, liu liu ba sira nebe maka dezenpeña funsaun publika, labele monu ba dalan nebe fasil, labele monu ba tentasaun korupsiun no regalia sira, no nunka kompromete hodi bele hetan lukru ruma ba interese individual.
- (4) Ne’e hanesan programa **ba ema hotu no konta ho ema hotu**. Organizasaun sociedade sivil, imprensa, sektor privadu, Igreja no konfisaun relijioza sira seluk, no sidadaun hotu hotu, sai hanesan parseiru estratejiku fundamental ba dezvoltamentu. Sira mak sei tau matan ba servisu Governu nian, no ho sira nia partisipasaun ativa no responsavel, sai hanesan simbolu nasional vivensia demokratika nian.
- (5) Programa ida ne’e programa ida ne’ebé nebe hare ba **inkluzan no kombate ba dezigualdade**, hodi kria oportunidade ba timor oan sira hotu, nebe hela iha kapital ka iha area remota sira, mana ka fetu, joven ka idosuzu sira. Abordajen integradu ba jeneru iha instituisaun governu nian hotu, ohin loron sai ona realidade iha Timor-Leste. Ami hakarak enkoraja fetu sira nia papel iha sociedade, laos deit tanba dever Estadu nian maibé mos tanba utiliza kapasidade no kualidade fetu sira nian iha vida politika, ekonomika no sosial pais nian, nu’udar nesiedade no vantajen ida ba ita nia dezvoltamentu

Senhor Presidente Parlamentu Nacional
Senhores Vice-Presidentes Parlamentu Nacional
Senhoras no Senhores Deputadus sira,

Relasiona ho buat hotu ne'ebé hau temi ona iha leten, Governu nida ne'e nia agenda politika maka foo continuidade, liu husi dinamika foun ida, hodi bele atinje rezultadu barak liu, iha pilar hat dezentvolvimentu nasional hanesan tuir mai ne'e :

1. Sektor Sosial

Nasaun nebe justu no dezentvolvidu maka nasaun ne'ebé investe iha dezentvolvimentu kapital sosial, ne'e inklui mos hodi promote asesu ba saude, edukasaun, formasaun profesional, informasaun, justisa sosial no kultura, gere no proteje didiak ita nia rekursu ambiental sira, fo valor ba kualidade vida moris ohin loron nian no fo resposta ba nesesidade ba jerasun nebe sei mai, tanba ne'e, ami sei kontinua garante asesu ba **servisu saude** hadiak atendimentu mediku, no mos regula sistema nasional saude, reforsa infra-estrutura no rekursu umanu kualifikadu, fo formasaun liu tan, no hadiak jestaun kondisaun servisu profesional saude sira nian. Iha tinan 2014, iha bolseiru foun hamutuk 1754 nebe estuda iha area espesializadu ka tekniku saude nian, nebe sira mos, wainhira remata, sei fo apoiu hodi hadiak sektor ida ne'e.

Ami sei kontinua implementa modelu servisu komunitariu no kuidadu domisiliariu ba ema hotu. Servisu abranjente ba suku sira ho populasaun husi 1.500 to'o 2.000, iha area ne'ebé remota liu, alkansa ona kobertura 50% iha tinan 2014. No sei buka hasae diak liu tan iha tinan hirak oin mai. Ami mos sei hadiak liu tan distribuisaun medikamentu, prevene no kombate ba malnutrisaun no reforsa programa vasina (ho objetivu atu alkasa, iha 2017, kobertura ida to'o 90% ba labarik sira ne'ebé iha tinan 1 mai kraik no vasina Pentavalente 3 no sarampu) ho insidensia, < 1 kazu ba populasaun (abitantes) 1.000, Timor-Leste atinje ona Objectivu ba Dezentvolvimentu Mileniu nian, hodi halo kombate ba malaria, no mos reduz tiaona mortalidade materna husi 557/100.000 iha 2012 ba 270/100.000 iha 2014. Ami mos sei kontinua haforsa no hadiak liu tan kuidadu saude ba kosok oan no labarik sira. Esforsu hanesan sei halao mos ba moras mental, sei fo mos edukasaun no sensibilizasaun kona-ba prevensaun ba moras infecto-kontajiosas.

Ami sei kontinua halo rehabilitasaun ba Ospital, Sentru no Postu Saude sira, ho objetivu atu hari'i Postu iha suku ida idak. Oras ne'e dadaun iha ona Postu saude 272, inklui konstrusaun Postu Saude 79 nebe halo iha tinan 2012. Oras ne'e dadaun 50% suku nebe'é maka iha populasaun liu husi 2.000, iha ona mediku ida, enfermeiru ka parteira ida nebe hela permanente iha fatin, no ami alvu ba 2017, maka bele alkansa 100%. Iha mos hanoin atu halo boot tan Ospital Nasional, ho servisu pediatria foun ida, no tau matan liu tan ba servisu espesializadu sira hanesan onkolojia, kardiolojia no hemodialise hodi minimiza deslokasaun tratamentu ba iha rai liur.

Governu sei kontinua halo esforsu makas hodi garante katak labarik no joven sira sei iha asesu ba **ensinu ho kualidade**. Ne'e implika ajilidade iha introdusaun politika edukasaun nian, laos deit iha kurikulum, maibe mos ho esforsu jestaun administrativa no finanseira nebe diak, kordenasaun instituisional diak no infra-estrutura no rekursu umanu kualifikadu no kompetente.

Ami sei kontinua halo projetu konstrusaun no ekipamentua ba pre-eskola foun to'o 250 no halo rehabilitasaun ba sala de aula nebe naksobu, atu nune metade husi labarik sira ne'ebé iha tinan 3 ka 5 bele iha ona asesu ba ensinu pre-eskolar. Ami mos sei kontinua reabilita eskola ensinu basiku no sekundariu iha pais laran tomak, sei hadia kondisaun ba profesor no dosente sira hodi bele hasae sira nia kompetensia no hodi fo formasaun kontinua, hodi ejiji sira nia profesionalismu no empenhu iha klase profisional ida ne'e, ne'ebé fundamental tebes iha ita nia pais.

Kualidade ensinu no apredizajen, no mos dominiu lian portuges, sei hetan apoiu liu husi metodolojia pedagogika no sientifika hodi hatudu rezultadu diak liu husi apoiu material eskolar ne'ebé adekuadu. Ami sei kontinua hasae kapasidade eskola sekundariu sira, dezenvolve estratejikamente eskola Tekniku-Vokasional sira, nune'e bele iha ema ne'ebé tama ba ensinu superior, ka bele no mos ba merkadu traballu, tuir nesesidade ba sektor produtivu ita nia país nian.

Governu sei kontinua promove sektor ensinu superior nebe efikaz, hodi bele garante avaliasaun no akreditasaun akademiku, formasaun kontinuo ba dosente sira, dezenvolve parseria ho instituisaun ensinu superior sira, hahu halo konstrusaun ba Institutu Superior Politekniku tolu hanesan – Engenãria iha Suai, Industria Servisu nian iha Lospalos no agrikultura nian iha Same – no Akademia Peska no Estudu Kona ba Tasi nian iha Manatutu, no Faculdade Engenharia UNTL nian, iha Hera.

Iha ambitu **formasaun profisional no empregu**, sei kontinua hametin Planu Formasaun no Edukasaun Teknika no Profisional, hodi investe iha kualifikasaun joven sira nian, iha area estratéjika iha industria minarai no gas, turismu, ospitalidade, agrikultura, konstrusaun sivil, maritima no automotora. Ami sei kontinua ho Kompromisu Nasional ba Formasaun, ne'ebé akreditadu no finansiadu ho media ema nain 2.500 tinan tinan, inklui moos programa estajio profisional. Tinan ida ne'e sei haruka tan traballador hamutuk 250 ba Republika Korea do Sul no Australia, no sei halo mos investimentu iha formasaun ba formador sira, iha dezenvolvimentu instalasaun no material ba formasaun, hanesan pur ezemplu Sentru Formasaun ba Jestaun Finansa Publika.

Justisa Sosial kontinua hanesan asuntu sentral iha Governu ida ne'e nia programa. **Protesaun Sosial** ba ema ne'ebé vulneravel liu, inan sira, faluk, idosos, deficiente, labarik no ita nia veteranu sira, tau aas tebes ideal liberdade nian, no ami sei kontinua fo apoio ba sira liu husi subsidiu ka husi material sira seluk. Ami sei kontinua servisu hodi adapta no hadiak liu tan rejime transitoriu seguransa sosial atu sai rejime definitivu ida, obrigatoriu no kontrIBUTIVU, ne'ebé sustentavel, hodi bele garante seguransa sosial ba traballador hotu hotu no ba sira nia familia.

Dignifikasaun, omenegen no apoiu ba **Kombatentes LibertsauNasional**, sei manten hanesan prioridade Estadu nian. To'o 2017, ami sei estabelese Konsellu Nasional ba Kombatente Libertasaun Nasional, hodi nune'e bele organiza mos Konsellu Kombatente iha nivel munisipiu sira, sei kontinua fo bolsa estudu ba sira nia oan no martir sira nia oan, ami mos sei halo prezervasaun no promosaun ba Istorია Libertasaun Nasional, iha tinan ida ne'e, ne'ebé atu celebra tinan 40 luta ita nia Eroi FALINTIL sira.

Ami sei fo apoiu mos ba instituisaun solidariedade sosial no kria Servisu Atendimentu Sosial, hodi fo formasaun ba asistente sosial sira ba futuru. Kompromisu ba direitu no oportunidade **ba feto sira** sai hanesan mos programa prinsipal ba Governu, hodi promove Politika Toleransia Zero ba violensia hasoru feto no labarik feto sira.

Meiu komunikasaun sosial, no haforsa liu tan ita nia **identidade nasional**, ne'e fundamental hodi dezenvolve ita nia kapital sosial. Ami sei kontinua dezenvolve diversidade no independensia orgaun komunikasaun sosial sira no promove asesu ba informasaun no edukasaun sivika. Nune mos, ami sei valoriza patrimoniu no kultura timor nian, liu husi prosesu hodi tau matan ba instituisaun kultural referensia sira hanesan – Biblioteca Nasional, Muzeu no Sentru Kultural no Akademia Arte no Industria Kreativa Kultural.

2. Sektor Infra-estrutura

Ita iha ona programa investimentu infra-estrutura basika integradu ne'ebé atu implementa ho rigor no sustentabilidade. Estrada, ponte, portu, aeroportu, edifisiu publiku, telekomunikasaun no konektividade sai hanesan aliserse prinsipal ba kresimentu no diversifikasaun ekonomika.

Ami sei kontinua implementa Programa Melloramentu **Estrada** nasional, liuliu ba hirak nebe at liu iha pais laran. Nune, molok mandatu ida ne'e remata, ami sei intervein iha ligasaun rodoviaria hirak hanesan tuir mai :

- Dili – Manatuto – Baucau
- Baucau Lospalos, e Baucau-Viqueque
- Maubara-Karimbala, Loes-Mota Ain, Gleno-Ermera
- Manatutu - Laklubar
- Díli-Liquiçá, Tibar-Glenu, Estrada nebe inklui mak hanesan Tasi Tolu – Tibar, Maubara – Karimbala, Glenu-Ermera.

Sei halo mos rehabilitasaun ba estrada municipal sira, engloba mos estrada sira ne'ebé iha Rejiaun Administrativa Espesial Oe-cusse no Atauru, hahu konstrusaun ba projetu estrada Díli – Aileu – Maubisse – Aituto – Ainaro – Cassa. Sei mos implementa Plano Mestre ba Estrada Rural no sei halo programa ida hodi reabilita no halo manutensaun ba estrada nasional, estrada urbanas no estrada rural sira. Sei halo manutensaun ba estrada nasional no munisipal sira hamutuk kilometru 1.426, reabilita estrada rural kilometru 268 no kontinua tau matan ba estrada rural sira ne'ebé reabilita ona ho total kilometru 521.

Governu sei kontinua halo jestaun ba bee mos no ba servisu abastesimentu bee no **saneamentu baziku**. To'o iha 2017, sei aumenta asesu be mos ba uma kain sira iha area rural, sei halo instalasaun sistema ba bee mos pelu menus 125. Sei hadia infra-estrutura bee no saneamentu urbanu, no halo sistema konstrusaun hodi kanaliza esgotu, hari'i instalasaun tratamentu ba bee lihun sira no hodi kanaliza ba tanke ne'bé iha fatin urbanu sira. Buat hirak ne'e hotu sei halao to tinan 2017, liu husi :

- Dezenvolve Planu Jeral ida ba Sentru Munisipiu sira, hanesan Baucau – Viqueque – Lospalos no Same.
- Estuda solusaun oin sa hodi halo abastesimentu bee nian iha Suai.
- Implementa Planu Jeral Bee nian ba Manatutu no Oe-cusse.
- Halo reparasaun ba furus, rehabilitasaun ba kanu sira ne'ebé at ona no halo instalasaun kanu ba bee mos liu husi via legal, no mos hodi hare sistema hodi halo bee matan foun, halo tanke no instalasaun bee.
- Liga bee ba uma, liu husi forneseimentu kanalizadu.

Nune mos iha Dili, sei implementa Planu Jeral ba Saneamentu no Drenajen, hodi mellora saneamentu ne'ebé fazeadu, hanesan mos halo rehabilitasaun ba drenajen, hodi kanaliza ketak ketak bee ne'ebé mai husi bee lihun no bee nebe mai husi udan ben.

Enerjia renovavel no eletrifikasaun rural sai hanesan pilar rua ba planu kona-ba **elektrisidade**, nune ami sei halo analize ne'ebé klean liu hodi hare ba nia kustu no benefisiu. Ami sei investe mos, liu liu ba area remota sira, ho hanoin ida atu halo instalasaun enerjia solar no eólica ne'ebé baratu liu no fasil instala no bele proteje ambiente.

Dezenvolvimentu **portu maritimu** hodi fasilita importasaun no esportasaun produktu sira nian, kontinua sai hanesan prioridade ho planu ida atu halo portu nasional multifunsaun Tibar, ne'ebé sei hahu konstrusaun iha tinan 2015, halo konstrusaun portu ida iha Suai, ne'ebé tama ona iha faze final konkursu nian, hodi sai hanesan baze lojistika ba sektor petroliferu, no obra ida ne'e sei halao iha tempu badak nia laran. To'o 2017 nia rohan, sei materializa pre-konstrusaun hodi dezenvolve portu entre Laga no Lautem, Atauru, Karabela no Manatuto. Sei investe mos iha dezenvolvimentu institucional no infra-estrutura **transporte terrestre nian**, fo prioridade liu hodi hadiak trafiku no seguransa sirkulasaun kareta no motor sira, ba **transporte aereo**, sei halo ampliasaun no modernizasaun ba Aeroportu Internasional no hahu halo estudo vialibilidade ba aeroportu munisipiu sira nian, iha 2016.

Telekomunikasaun iha funsaun fundamental ida hodi hasae kbit emprezarial no hadiak prestasaun servisu, ho nune'e ami sei haka'as an hodi garante halo ligasaun Timor Leste liu husi fibra optika terestre ka liu husi tasi okos, hodi iha asesu ba rede nasional no internasional, no ami sei prepara estudo ba proposta ligasaun sira ne'e.

3. Sektor Ekonómiku

Sustentabilidade no diversifikasaun ekonomika sai nu'udar faktor importante ba Timor-Leste nia dezenvolvimentu. Ita labele depende bebeik ba reseita petroliferas, liu liu bainhira rekursu ne'e limitadu ona no bainhira folin minarai tun, halo enkonomia vulneravel kedas, hanesan ita nian kazu.

Investimentu ne'ebé diak ba sektor ekonomiku hanesan agrikultura, peska, turismu, industria ki'ik no industria petrokimika, sai fundamental tanba hamosu empregu.

Ami sei enkoraja **sektor agrikola** atu sai forte liu tan, halao pratika agrikola ne'ebé diak liu hodi utiliza teknolojia foun ba produsaun no kolleta, fo formasaun teknolojia adekuadu hodi halao servisu, fo orientasaun ba agrikultor sira tuir sikunstansia lokal (*tempu udan no bailoron*). Atu estratejia ida ne'e bele hetan susesu ita presiza asegura fornesimentu bee ba agrikultura no investe makas iha irigasaun. Ho nune'e maka ita bele hasae produsaun fos no batar, hadiak liu tan produsaun kafe no baunila, nos-moscada no mina nu.

Ami sei nafatin disponibiliza ba agrikultor sira fini, fertilzantes (*rai metan & pupuk*) no pulverizadores (*aimoruk hodi oho ular*), no mos ekipamentu agrikultura nian. Ami sei mos habelar kobertura ba formasaun ida ne'ebé konsistente, apoiu ba agro-industria sira, no mos kampaña estensaun agrikola. Programa intersectoral **hakiak karau no animal ki'ik sira**, iha area apropriadu, liu husi sistema estabelisimentu koperativa no promosaun agropekuaria, no mos kuidadu basiku ba animal sira nia saude, ho programa pilotu foun vasinasaun nian, hodi kontrola brucelose (*moras animal nian*), sei hadiak seguransa nutricional iha pais laran no sei hamosu rendimentu ba uma-kain sira.

Governu sei kontinua promove esplorasau sustentavel **ba rekursu mariño**. ho pontensia ne'ebé boot iha ita nia tasi ninin tomak, ho benefisiu ba nutrisaun no ekonomiku ba ita nia Munisipiu 11 ne'ebé maka liga ho tasi (iha tasi ibun). Estratejia Nasional Dezenvolvimentu Akuakultura iha ona hanoin atu investe no estabelese akuakultura ikan nian, hanesan ikan tilapia no espesie seluk nebe iha valor komersial no iha nutrisaun diak.

Governu reve dadauk ona linsensa ba peska komersial iha zona teritorial tasi nian ne'ebé iha ona. Iha kontestu ida ne'e, ami sei tau atensaun makas liu hodi halo patrullamentu no vijilansia iha ita nia tasi laran, hodi bele proteje ita nia ahu ruin no kontrola peskador ilegal sira ne'ebé halo atividade iha ita nia tasi laran.

Sector Turismu bele sai hanesan fonte rendimentu boot ida, bainhira ita hatene uza ita nia rikesa narural, paizajen ne'ebé riku, no rikeza kultural no istoriku. Ita nia potensia turistika bele hetan supremasia ne'ebé boot iha Azia, ho qualidade atrasaun turistika ne'ebé foun, bainhira ita dezenvolve estratejia intersektoral ida, hodi hare ba rekursus umanu, infra-estrutura no atividade halo promosaun.

To'o 2017, ami sei fo prioridade hodi halo projetu konstrusaun sentru formasaun turismu no otelaria iha Dili no hodi elabora Planu Mestre ba Turismu ne'ebé tau atensaun ba zona turistika importante tolu – oriental, sentral mo osidental (*loro sa'e, rai klaran no loro munu*)-, hanesan mos projesaun internasional, inklui partisipasaun iha Espozisaun Universal Milão 2015, sei haburas sektor ida ne'e ba dezenvolvimentu ekonomiku.

Sei tau atensaun mos ba iha sector **komersiu**, disponibiliza tan armazem tranzitu no konservasaun no makina deskaskador iha pais laran tomak. Fo tan formasaun emperezarial liu husi IADE, hodi fo formasaun no kapasitasaun emperezarial, no apoiu estudu ba merkadu servisu nian, dezenvolve estratejia komersializasaun, formasaun no asistensia teknika no

dezenvolvimentu teknolijia, produtu no finansimentu hodi bele enkoraja sektor **agro-industria**.

Governu sei kontinua fo apoiu ba **industria petrolifera**, sei kontinua fo formasaun ba rekursus umanus atu servisu iha sektor ida ne'e – area jeolojia, engeñeria kimika no pretrolifera, finansa minarai nian no jestaun ba projetu – atu halo dezenvolvimentu kosta sul. Ami sei dezenvolve mos industria mineira hodi halo aprovasaun kodigu mineiru nian no halo transformasaun Autoridade Nasional Petroleo ba fali Autoridade Nasional Petroleo no Mineral no hamosu Kompañia Nasional Mineira – hanaran MINAS DE TIMOR.

Sei kontinua halao servisu iha **senariu empresarial no investimentu** hodi envolve sektor privadu ida nebe diversifikadu, ho prioridade hodi halo regularizasaun no rejistu propriedade no halo aprovasaun Lei ba Rai, no mos dezenvolve Parserias Publikas Privadas, habelar asesu kreditu ba sektor privadu nasional no hadiak servisu neebé fo apoiu ba empreza sira. Ami mos sei kontinua fo apoiu ba dezenvolvimentu Zona Espesial Ekonomia Sosial ba Merkadu Oe-cusse Ambeno no Atauro.

Ikus mai, atu ita bele iha ekonomia ida nebe dezenvolidu bainhira ita sei kombate hasoru indiferensa no dezigualdade iha rai laran tomak, kontinua fo priorida ba **politika desentralizasaun**. To'o 2017, Governu sei implementa Politika Desentralizasaun Administrativa no Intituisaun Poder Lokal, reorganiza Administrasaun Lokal hodi halo deskonsentrasaun kompetensia servisu nian. Ba ida ne'e, ami sei halo projetu-pilotu ba instalasaun desentralizasaun nian iha Aileu, Likisa no Ermera.

4. Sektor Boa Governasaun

Politika fiskal ne'ebé sustentavel no despeza publika ne'ebé koerente ho ida ne'ebé planeia tiha ona. Esensial tebes atu evita desperdisiu hodi alkansa meta sira ne'ebé orienta ona ba rezultadu. Melloria prestasaun serivisus publikus obriga atu hamosu sektor publiku ida ne'ebé sustentavel no efisiente liu, no tanba ida ne'e, funsaun publika rekere programa reforma ida ne'ebé berani, no determinadu iha ninia ezekusaun.

Ami sei investe iha politika diak liu iha area **planeamentu no investimentu stratejiku**, liu husi resionalizasaun rekursus finanseiru no estudu viabilidade, no mos levantamentu dados hodi bele hatene kondisaun real pais nian, inklui estudu kona ba kiak, no Sensus iha tinan 2015.

Nune'e mos iha investimentu stratejiku, Governu sei halo kontaktu no estudu ne'ebé klean liu, hodi bele iha possibilidade aparezenta proposta ba planu investimentu Fundu Minarai nian. Sei kontinua halo prosesu aprovisionamentu ho transparensia ho rigor, avaliasaun no monitorizasaun ba projetu fisiku sira, ho ba projetu sira ne'ebé halao liu husi tinan ida nia laran husi fundu espesial investimentu iha infra-estrutura no kapasitasaun ba rekursu umanu iha sektor stratejiku sira.

Atu fasilita partisipasaun ativa no responsavel liu, iha prosesu dezenvolvimentu no hadiak prestasaun servisu, ami sei hahu programa ida ne'ebé hanaran **“Governu Elektronik”**,

hanesan plataforma Governu ho sidadaun sira hodi bele fasilita prestasaun servisu liu husi internet.

Ami sei kontinua fo prioridade boot ba reforma iha **defeza no seguransa**, hodi kontinua implementa planu estratéjiku no bele aseguira profesionalismu, integridade, kapasitasaun no kapasidade husi ita nia Forsa Armada no Polisia Nasional sira.

Ami sei kontinua hadiak funsionamentu ita nia instituisaun **justisa** nomos reforsa kompetensia no kapasidade ita nia kuadru sira. Iha tempu badak nia laran sei halo avaliasaun ne'ebe klean liu ba sektor justisa no sei estabese kuadru koperasaun ne'ebé sei adopta tuir nesiedade pais nian.

Ita sei halao ita nia **politika esterna** hodi proteje no promove interese fundamental povu timor oan nian, hodi salvaguarda independensia, soberania no integridade nasional ita nia Nasaun. Hare ba efeitu husi globalizasaun, no mos ba lokalizasaun estratejika ita nia rain diak tebes-tebes, maka ita sei uza diplomasia hodi bele garante seguransa no hodi proteje ita nia rekursu natural.

Sei adapta politika amizade no koperasaun ho pais hotu hotu iha mundu, no espesial liu, ita nia pais viziñu no parseiru dezvoltimentu. Ami sei halo esforsu laos deit atu fortalese relasaun bilateral ho parseiru rejional sira maibe haforsa liu tan papel Timor-Leste nian iha organisasaun no estrutura rejional no internasional sira.

To'o tinan 2017, ita sei elabora Livru Branco ba **Politica Externa**. Governu sei kontinua halo esforsu adesaun Timor-Leste nian ba ASEAN, sei kontinua kompromisu bainhira asume kargu hanesan Presidencia Rotativa CPLP, hodi promove dinamika foun organizasaun ida ne'e, ho espesial atensaun ba iha koperasaun ekonomika no emprezarial. Liu husi Kosellu ba Delimitasaun Definitiva Fronteira Maritima nian, sei halo esforsu tomak atu Estadu Timor Leste halao efetivamente ninia poder soberania iha teritoriu nasional, tuir direitu internasional.

Senhor Presidente Parlamento Nacional
Senhores Vice-Presidentes Parlamento Nacional
Senhoras no Senhores Deputados sira

VI Governu Konstitusional, liu husi ninia Programa, apela ba envolvimentu no empenamentu ema hotu hotu nian, sem esepasaun, atu ita hamutuk halo parte iha dezvoltimentu sustentadu no ekilibradu ita nia pais nian, deztvolvimentu ida ne'ebé halao ho ema hotu hotu no benefisia ba ema hotu hotu, iha kontestu konstrusaun ita nia prezente no futuru Timor-Leste nian.

Ho espiritu dever ida ne'e, ho responsabilidade no uniaun, ita ida idak sei fo ita nia kontributu, no ita hotu hamutuk bele halo diferenza. Dever no responsabilidade ida ne'e, hahu ona ohin, wainhira ita komesa ita nia debate konstrutivu ba Governu nia Programa.

Ita nia nasaun joven ne'e, alkansa ona progresu barak no hau iha serteza katak ita hotu ne'ebé ohin iha ne'e, rekoñese realidade ida ne'e, ho orgullu no seriedade. Maibe sei iha dezafiu barak, no a luta kontinua ba kauza dezvoltamentu nasional nian.

Obrigadu wain.

Dr. Rui Maria de Araújo
Loron 24 fulan Marsu tinan 2015